

In institut per las linguas en il Grischun

Bezzola ha inoltrà ina moziun

■ **(anr/ld) La confederaziun ed ils chantuns mainan ensemen ina instituziun scientifica per la promoziun da la plurilinguitad. Quai prevesa il sboz da la nova lescha davart las linguas naziunales e la chapientscha tranter las communitads linguisticas.**

Ussa sa tschenta natiralmain la dumonda, nua duai questa instituziun vegnir installada? Tenor il parairi da cusseglier naziunal *Duri Bezzola* en il Grischun. En ina moziun inoltrada l'emna pasada propona Bezzola da surdar questa incumbensa al Grischun. Gia dapi diesch onns saja en discussiun in tal institut. En in pajais sco la Svizra cun ses quatter linguatgs saja in institut per la promoziun linguistica pli che urgent, scriva Bezzola.

La pretensiun da domiciliar quest institut en il Grischun saja giustifitgada e giavischada per ils motivs sequents: Il Grischun è il sulet chantun da la Svizra cun trais linguas. Consequentamain sto il Grischun schliar bleras dumondas linguisticas e giuridicas complexas sco planisaziun, concepziun e svilup da las trais linguas. Rumantsch dettia i be en il Grischun e quest linguatg saja periclità. I dovria mesiras extraordinarias per pudair salvar questa quarta lingua naziunala, ha Bezzola punctuà. Il legislatur haja chapì il problem e formulà en la nova constituziun (art. 70) las directivas necessarias. En vista a talas declamaziuns stoppian ussa suandar acziuns concretas, mane-gia il moziunari.

La Lia rumantscha cun sias resursas finanzialas e persunalas limitadas na possia betg schliar suletta – sper la lavur da mingadi – las dumondas specificas che noss temp pretendia. La Lia rumantscha haja urgentamain basegn d'ina cussegliaziun e d'in accompagnament scientific.

Il chantun Grischun saja la suletta regiun pli gronda che na possedia betg ina università. Engrevgiant saja plinavant il fatg che las interpresas da la confederaziun hajan transferì bleras plazzas en la Bassa ils onns passads. La domiciliaziun en il Grischun da l'institut prendì en egl fiss – dal puntg da vista da la politica dal stadi – in act pli che giustifitgà, ha Bezzola constatà.